

## DOMENIE XXVIII «VIE PAL AN»

### Antifone di jentrade Sal 129,3-4

Se tu tegnîs cont, Signôr, de tristerie, cui rivaraial a parâsi?  
Ma li di te si cjate misericordie, Diu di Israel.

### Colete

La tô gracie, Signôr, ti preîn,  
che e cjamini simpri denant di nô e nus compagni,  
e nus fasi jessi saldo impegnâts intes oparis.  
Pal nestri Signôr Jesù Crist to Fi, che al è Diu  
e cun te al vîf e al regne dutune cul Spirtu Sant,  
par ducj i secui dai secui.

### PRIME LETURE 2 Re 5,14-17

Naaman, tornât dal om di Diu, al crodè tal Signôr.

Dal secont libri dai Rês

In chei dîs, Naaman il sirian al dismantà jù e si lavà siet voltis tal Jordan daûr de peraule di Liseu: la sô cjar e diventà tant che la cjar di un frutin.

Al tornà di Liseu cun dute la sô scorte, al jentrà, si butà denant di lui e i disè: «Sì, cumò o sai che no 'nd è altri Diu in dut il mont fûr che in Israel! Acete, par plasê, un regâl dal to famei». Ma Liseu i rispuidè: «Vêr come che al è vîf il Signôr, che jo o soi denant di lui, no cjolarai nuie di te».

Naaman al insistè che al acetàs, ma lui nol volè savênt. Alore Naaman i disè: «Za che al è no, lasse che si dedi al to famei chel tant di tiere di podê cjamâ doi mui, parcè che il to famei no ur ufrissarà plui ni olocaust ni sacrifici a dius diferents, ma dome al Signôr».

Peraule di Diu.

### SALM RESPONSORIÂL dal Salm 97

R. La salvece dal Signôr e je par ducj i popui.

Cjantait al Signôr une cjante gnove,  
parcè che al à fatis robonis.  
Lu à fat vinci la sô diestre,  
il braç de sô santitât. R.

Il Signôr al à palesade la sô salvece,  
in face di ducj i popui  
al à pandude la sô justizie.  
Si è visât dal so boncûr,  
de sô fedeltât pe cjase di Israel. R.

Ducj i confins de tiere a àn viodude  
la salvece dal nestri Diu.  
Che i cjanti al Signôr dute la tiere,  
berlait, scriulait cu lis cjantis plui legris. R.

### SECONDE LETURE 2 Tm 2,8-13

Se cun Crist o tignarîn dûr, cun lui ancje o regnarîn.

De seconde letare di san Pauli apuestul a Timoteu

Benedet, ricuarditi che Jesù Crist, de gjernazie di David, al è risussitât de muart seont il gno vanzeli. Par colpe sô jo o patîs ogni sorte di penis fin a vê lis cjadenis, come che o fos un delinquent. Però la peraule di Diu no je incjadenade! Par chel o patîs dutis chestis robis pai elets, par che a rivin a la salvece che e je in Crist Jesù, insiemi cu la glorie eterne.

Cheste e je une peraule che e merte crodude:  
Se o sin muarts insiemi cun lui, cun lui ancje o vivarìn.  
Se o tignarìn dûr, cun lui ancje o regnarìn;  
se po lu rinearìn, ancje lui nus rinearà.  
Se nô no sarìn fedêi cun lui, lui invezit al reste fedêl,  
parcè che nol pò rineâ se stes.  
Peraule di Diu.

### **CJANT AL VANZELI cf. 1 Pi 2,9**

**R.** Aleluia, aleluia.

Vualtris o sês la gjernazie siele,  
i predis e i rês, la int sante:  
contait lis grandis voris di lui,  
che us à clamâts dal scûr a la sô lûs sflandorose.

**R.** Aleluia.

### **VANZELI Lc 17,11-19**

**No isal tornât indaûr nissun a ringraziâ Diu fûr di chest forest?**

Dal vanzeli seont Luche

Biel che al leve viers Jerusalem, Jesù al passà pe Samarie e pe Galilee. Jentrant intun borc, i vignirin incuintri dîs levrôs, che si fermarin un tic distants di lui e i diserin a Jesù ad alte vôs: «Jesù, mestri, ve dûl di nô!». A pene che ju viodè, Jesù ur disè: «Lait dai predis e presentaitsi di lôr». E intant che a levin, a forin smondeâts. Ma un di lôr, a pene che si viodè vuarît, al tornà indaûr glorificant Diu a dute vôs; si butà in zenoglon par tiere denant di Jesù par ringraziâlu. E al jere un Samaritan. Alore Jesù i disè: «No sono stâts vuarîts ducj i dîs? E dulà sono chei altris nûf? <sup>18</sup>No isal tornât indaûr nissun a ringraziâ Diu fûr di chest forest?». <sup>19</sup>E i disè: «Jeve sù e va: la tô fede ti à salvât».

Peraule dal Signôr.

### **Su lis ufiertis**

Acete, Signôr, lis preieris dai fedêi  
dutune cu l'ufierte dal sacrifici,  
par che, in grazie di chest at di sante religjon,  
o podìn rivâ a la glorie dal cîl.  
Par Crist nestri Signôr.

### **Antifone a la comunion Sal 33,11**

I grancj a son colâts in miserie e la fan a patissin,  
ma chei che si avodin al Signôr no ur mancje propit nuie.

### **Daspò de comunion**

O suplichìn umilmentri la tô maiestât, Signôr,  
par che tu nus fasis vê part de vite divine  
come che tu nus nudrissis cul sant sostentament dal Cuarp e dal Sanc.  
Par Crist nestri Signôr.